

## Paur kute Korxikam me jamã pi'ôk no'ôk ne ja.

Me'ô nhidjibê Epapraj ne arÿm Paurkôt Jejuo aminhõ. Ne kam akubyn õ pykabê Korximã tẽn kam memã ar Jeju'ã ujarẽnh ba. Nhyim mekam kwÿ arÿm tu amim Jeju markumrẽx ne kôt aben pydji. Nhyim kam Epapraj Paur'ÿr tẽn bõx. Mekbê ijê djâkam Paur ãm rã'ã nhyim Epapraj 'ÿr bõx ne kam õ pykabê Korxikam ar ja Paurmã ar arẽnho nhÿ. Nhyim kam tu Paur kute ar omũnh kêt kam tu kum ar kĩnhkumrẽx. Kute ar omũnhmãn prãbê tu kum ar kĩnhkumrẽx ne kam arkum pi'ôk no'ôk ne. Nhyim bep Korxikam me kwÿ ne me Metĩndjwÿnh kabẽn kupa'ã ar memã arẽnho ba. Nãm me 'êx ne we,

—Me mykà rênhbit ne Metĩndjwÿnh kum me kĩnh ne meo kra. Ne ajte memã 'êx ne we,

—Metĩndjwÿnh kadjy mrãnh djwÿnhmã akabẽn. Djãm abẽnjadjwÿr got ga katàt Metĩndjwÿnhmã amijarẽ? Dja ga kadjy mrãnh djwÿnh kumrẽxmã amijarẽ gê amũ kum ajarẽ, ane. Kati, nãm me memã 'êx. Nhyim me kute mÿjja krẽnmã nhyim me mebê mÿjja pyman memã kum,

—Ë, kwãrik wãnh ja krẽn kêt, ane.

Kam ne Paur arkum,

—Kwãrik wãnh atemã me kabẽnwã mar kêt. Nhyim bep Kritu ne kabẽn mexkumrẽx. Tãm gêdja gar 'ãno djan kabẽn ma. Kritu ajbit kute me utàr. Kwãrik wãnh kadjy mrãnh djwÿnhmã akabẽnwã wãm nõ. Kritu pydji ne kute me utàr. Kwãrik wãnh atemã 'õ jabej kêt. Ajbit ne Metĩndjwÿnh djwÿnhĩ ne mÿjja kunĩ 'y ne kute me utàr. Nà, nhyim Jeju Bãmbê Metĩndjwÿnh tãm ne amiwÿr me bajo bõx. Kra kukwakam amiwÿr me bajo bõx ne me bajo

õbikwakumrëx. Nãm ã Paur arkum pi'òk no'òko anen kam arkum ano. Tãm ne ja.

<sup>1-2</sup> Ba ibê Paurmê gwaj bakamy Ximoximê ne bar ar amã pi'òk no'òk ne. Ibê Paur, Metĩndjwỳnh kute ijã amim karõ nhym Jeju Kritu kute ijanor ba itêm, ba, ba ne ba ar amã pi'òk no'òk ne. Krĩraxbê Korxikam Kritu nhõ me ja, õ me mextire ja, ar aje amim Kritu markumrëx ne 'ã angrà tỳx ne Kritukõt aje abeno akamyja, ar amã ne ba pi'òk no'òk ne.

Gê Metĩndjwỳnh ar ajo djuw mex, Metĩndjwỳnhbê me Babãmmê krabê Bẽnjadjwỳr Jeju Kritu ar ukaprikõt ar ajo djuw mex ne ar ar ajo ba, ne ar amã umar mex jarê gar adjumar mex ne ar aba.

*Paur kute Metĩndjwỳnhmã arkam amikĩnh jarënh.*

<sup>3</sup> Bar ije Metĩndjwỳnhmã ar ajo idjà'wỳrkõt mã kum ar akam amikĩnh jarê. Bãmbê Metĩndjwỳnh, gwaj banhõ Bẽnjadjwỳr Jeju Kritu Bãmbê Metĩndjwỳnh kumã ne bar amikĩnh jarê. <sup>4</sup> Mỳkam ne bar kum ar akam ikĩnh jarê? Bir, nã gãm ar tu amim Kritu Jeju markumrëx ne kam kõt amã me jadjwỳ jabêkumrëx, amã õ me ja, õ me mextire ja jabêkumrëx bar arỳm kuman kam ikĩnhkumrëx.

<sup>5</sup> Be, kute ar amã mỳjja mex djir ne gar kam ama. Metĩndjwỳnh kute kàjkwakam ar amã mỳjja mex djir ne katàt ar amã arënh, mỳjja mex tãm ne gar aman tu amim kamnhĩxkumrëx ne kam kam ama. Ar aje mỳjja mexkam amakkam ne gar tu amim Jeju markumrëx ne kam kõt amã õ me ja jabêkumrëx. Bir be, nã gãm ar Jeju'ã ujarënh nyja man tu amim kamnhĩxkumrëx. Jeju'ã ujarënhja ne katàt nõ. Kabën punu kêt. Kabën 'êxnhĩ kêt. Kam ne katàt nõ.

<sup>6-7</sup> Be, Jeju'ã ujarënh ny arỳm wãkam ar awỳr bõxwã pumũ. Nãm me pyka kunĩkõt Jeju'ã ujarënhõ ajmà. Arỳm ne me o ajmà nhym me ar akudjwa arỳm kuman arỳm

kum mỳjja mexbit kĩnh ne ar o ba. Nãm me mỳjja mexbit ma. Be, nãm ã wãkamdjwỳ ar amã arẽnho ane. Gar arỳm ã mỳjja mexbit maro ane. Krax kurũm ar aje mar totokbê ne gar ã amijo ane.

Epapraj ne ar amã Metĩndjwỳnh jarẽnho tẽ gar arỳm kôt maro tẽ. Nà, Epapraj ne ar amã Metĩndjwỳnh djukapřĩ jarẽ. Metĩndjwỳnh ne ukapřĩkôt ar ajo djuw mex. Nhym Epapraj ar amã ukapřĩ jarẽ gar kam arỳm tu amim markumrẽx. Nã gãm ar anhõkre kadjwỳnhbê,

—Nã, mrãmri ne arỳm Metĩndjwỳnh djukapřĩkumrẽx ne ja, ane. Nã, Epapraj ne ar amã arẽ gar maro tẽ. Ar imã Epapraj kĩ:nhkumrẽx. Nãm ar ikôt àpẽn ar ba. Mrãmri Kritu nhõ àpẽnkhkumrẽx ne kum àpẽn ar ba ne kute kanga kêtumrẽx. Nãm wãm ar akam bõx ne ar ikõpdji'ã ar àpẽn ba.

<sup>8</sup> Be, Epapraj, ta ne ar imã ar amex jarẽn ar imã,

—Ota arkum aben jabêkumrẽx. Metĩndjwỳnh Karõ ne abenã arkum karõ nhym ar arỳm kum aben jabêkumrẽx, ane. Nãm ã ar imã ar ajarẽnho ane.

<sup>9</sup> Bir be, kam ne bar mã kum ar ajo a'uw. Epapraj kute ar ajarẽn ar ije mar totokbê ne bar Metĩndjwỳnhmã ar ajo idjà'wỳr ry typydji. Nã bãm ar kum ar ajã,

—Dja ga přĩne arkum 'ã karõ gẽ ar kuman akabẽnkôt ar amijo ba. Dja ga Akarõo přĩne ar no bõ, Akarõo ar no bõ gẽ ar přĩne akukràdjà ma. Nã bãm ar ã kum ar ajo idjà'wỳro ane.

<sup>10</sup> Bir be, dja Metĩndjwỳnh přĩne ar amã ar adjapẽn'ã karõn ar ano bõn ar amã amikukràdjà jarẽ gar kam arỳm mã kôt amijo aba mextire gẽ Bẽnjadjwỳr ar akam kĩnhkumrẽx. Ga kam ar amã mỳjja mexbit kĩnh ne ar o aban ajte Metĩndjwỳnh maro tẽ:n amũ maro ajkamẽn mar rax ne.

<sup>11</sup> Gêdja Metĩndjwỳnh přĩne ar ajo tỳx. Djãm uma ngri got. Uma raxo kute mỳjja kunĩ jakrenh. Ta tỳxo godja

přine ar ajo tỳx ne, ta mexo přine ar ajo mex ne. Ga kam ar akrànmã amijo aba. Kwãrĩk wãnh gē te mỳjja punu ar akam apōx nàr kon ar akaprĩ ar akam apōx gar mã Jejukôt ajkamēn tu akrànmã amijo aban angryk kêt ne tu akĩnhkumrēx. <sup>12</sup> Ne tu Jeju Bãmbê Metĩndjwỳnhmã amikĩnh jarē.

Bir, mỳkam? Bir, arỳm ne gwaj bajo mex. Gwaj bamex nhym kute ò me mextire jamē ro'ã gwaj bamã mỳjja nhõrmã. Kute ò me jamã mỳjja mextire djir ja tãm gēdja gwaj baro'ã gwaj bamã kungrà. Ò pykakam a'ubit, ò pykakam me axwe 'ò kêt, mỳjja punu 'ò kêt tãm'yr dja gwaj bōx nhym kute gwaj bamã mỳjja ngrành ne kam ar kute gwaj bajo bamã. Kadjy ne gwaj bajo mex ne.

<sup>13</sup> Be, arỳm ne mrãmri tu gwaj bapytàrkumrēx. Amrēbê ne Xatanaj ar gwaj bajo ba gwaj kam bamã bajaxwebit kĩnh ne ar o baba nhym kam kute mrãmri akamàt kô tykkam kute ar gwaj bajo ba pyræk. Nhym arỳm Metĩndjwỳnh kubê gwaj bapytà nhym arỳm wãnh ar ba. Arỳm tu Xatanajbê gwaj bapytàrkumrēx. Xatanaj kute àtykri ar gwaj bajo bajabê ne arỳm gwaj bapytà nhym Kra arỳm ar gwaj bajo ba. Bãm kum Kra kĩnhkumrēx ja ta ne arỳm ar gwaj bajo ba.

<sup>14</sup> Nà, Bãm ta Xatanajbê gwaj bapa 'amỳ. Amrēbê Xatanaj ajbit ar gwaj bajo ba nhym kam Bãm kubê gwaj bapa 'amỳn gwaj bajo katon gwaj bajaxwe tu o aknon gwaj bajo ba. Kra tyk ne kamrô bikapĩnkôt ne Bãm gwaj bapytàn gwaj bajaxweo aknon tu mar kêt ne.

*Kritu kute raxo katàt me kunĩ jakrenh.*

*Dju r 1.1; Kar 10.36; Kor 2.9; Idja 1.2*

<sup>15</sup> Nà, kra ta ne memã Bãmo amirĩt ne. Djãm me kute noo Metĩndjwỳnh pumũnh got. Me kute noo omũnh kêt. Nhym kam kra ta memã Bãmbê Metĩndjwỳnho amirĩt

ne. Amě ar kute aben pyræk. Ar amě tāmỹ. Nhym kam kra ta memã Bãmo amirĩt ne. Ne kam ajte kubê Metĩndjwỳnh Krakam ta ne õ mỳjja kunĩ djwỳnh, mỳjja kunĩ nhõ bẽnjadjwỳr.

<sup>16</sup> Ta ne kute mỳjja kunĩ 'yr djwỳnh. Bãm kaběnkõt ne mỳjja kunĩ 'y. Kàjkwamě pykakam mỳjja ja kunĩ 'y. Mỳjja me kute noo omũnhjamě mỳjja me kute noo omũnh kětjamě, tãm ne kunĩ 'y. Me karõ nhõ bẽnjadjwỳrmě kadjy mrãnh djwỳnh nhõ bẽnjadjwỳrmě mebêngòkre\* nhõ bẽnjadjwỳr rũnhmě bẽnjadjwỳr krymě mỳjja kunĩ ne amim ipêx ne. Bãm kaběnkõt amim ku'y. Nãm pũne amim mỳjja kunĩ 'y, pũne o atom, kam ne õ mỳjja kunĩ djwỳnh, ta õ mỳjja djwỳnh.

<sup>17</sup> Adjækam, mỳjja kator kětři ne Jeju ar tĩn ne ba. Djãm pykabê mỳjja ta ar ba? Kati, ta ne kute mỳjjao ba djwỳnh ne kam kute mỳjja 'õ kanga kět kumrêx. Kute mỳjja kunĩ 'yrkam ne kute mỳjja 'õ kanga kêt. Kra ta ne ar mỳjjao ba. Nhym mrãmri mỳjja tu kunĩ rã'ã: rã'ã.

<sup>18</sup> Nhym ajte Krabê Jeju ta ne õ me ja kadjy bẽnjadjwỳr. Me kute amim Jeju mar ne kõt amijo baja me tãm ne me kute Jeju nhĩ pyræk. Nhym bep Jeju ne kute krã pyræk. Jeju ne kam õ me ja kadjy bẽnjadjwỳr. Ta ne kutewa ne kam amikõt mỳjja kunĩo apôxo tẽ. Ne kubê Metĩndjwỳnh krakam kumrêx me tyk kurũm tĩn ne kato. Kam ne ajbit pydji raxo kute mỳjja kunĩ jakrenh, raxo mỳjja kunĩmã wa.

<sup>19</sup> Kubê Metĩndjwỳnh djwỳnhĩ. Apỹnh Ar kubê Metĩndjwỳnh djwỳnhĩ. Kra kubê Metĩndjwỳnh djwỳnhkumrêx. Metĩndjwỳnh ne Kramě kute aben pyræk'ã amim karõ nhym kam Kradjwỳ kubê

---

\* 1:16 Apỹnh me õ pyka djari kunĩkõt ne me kunĩ bêngòkre. Kuběkã jakamě me kakrãtykmě me babêngòkremě ne me kunĩ: bêngòkre.

Metĩndjwỳnh djwỳnhĩ. Ar amě kubě Metĩndjwỳnh djwỳnhĩ.

<sup>20</sup> Bir be, Metĩndjwỳnh ta ne amim Kra'ã karõ, krakõt kute amim mỳjja kunĩo õbikwamã, pykakam mỳjja nàr kàjkwakam mỳjja, kunĩ kute o õbikwamã. Mỳjkõt? Krakõt, kra ne me kadjy pĩte'ykam tyn kamrõ ajkapĩ nhym kam kõt Bãm memã kaběn mex jarě nhym me arỳm umar mexbit ma.

*Metĩndjwỳnh kute meo õbikwa.*

<sup>21</sup> Amrěbě ne gar Metĩndjwỳnho akurě djwỳnh. Ar aje ajaxwekõtbit ajamak běn ne aje mỳjja jaxwebit ar o abakam ne gar o akurě djwỳnh. <sup>22</sup> Nhym bep ajbir ne Metĩndjwỳnh ar ajo õbikwa. Nã gãm ar te amã kurě nhym Metĩndjwỳnh tu ar ajo õbikwakumrěx. Kra ne me kadjy amijo kuběngõkren ruwn kam ty. Nhym kam kõt Metĩndjwỳnh ar ajo õbikwakumrěx. Mỳj kadjy ne ar ajo õbikwa? Bir, kute amiwỳr ar ajo bõx, gar kabem aku'êmã. Ar mrãmri Metĩndjwỳnh mexo amextire ne ajmã akute kêt ne ar aba ne ar akam mỳjja punu 'õ kêtikumrěx ne kabem aku'êmã. Kadjy ne Metĩndjwỳnh ar ajo õbikwa, godja gar arek o těn kanga kêt jabej. <sup>23</sup> Godja gar arek aje Jeju 'ã angràn mrãmri adjãm tỳx ne aje kanga kêt jabej ne kam ajte amijã kamnhĩxbě kam amak ar o aban kanga kêt jabej. Nã gãm ar arỳm Jeju'ã ujarěnh nyja man kam amim kamnhĩx ne kam kam ama. Godja gar mrãmri arek kõt amijo atēm rã'ã ne aje kanga kêt jabej ne kam mrãmri arỳm 'ỳr bõx. Djãm ar gajbit ne gar Jeju'ã ujarěnh ma? Kati, pyka kunĩkõt ne Jeju'ã ujarěnh mekõt ajmã. Ba ibě Paur ne ba memã Jeju kukràdjà ny'ã idjujarěnh mō. Idjapěnh ne ja. Kam ne ba kàjbě memã 'ã idjujarěnh mō.

*Paur me kadjy àpěnh.*

<sup>24</sup> 'Ā idjujarēnh mō nhyṃ me arỳm kōt ijo ajkē ba itokry ne. Djām kōt ikapri? Arkati, ikīnhkumrēx. Me akadjy ne ba itokry ne kam ikīnh ne. Mete Krituo bikēnh nhyṃ tokryja 'ā ne me ijakre. Ba kam ba itokrykōt mete inhō bikēnh ba, ba itokryjakōt ne ba Kritu tokry nhinomā rēnhō tē. Jeju nhī kadjy, mete amim Jeju mar ne kute Jeju nhī pyrākja, me kadjy ne ba itokryja. <sup>25</sup> Ne me akadjy idjāpēnhja. Metīndjwỳnh ne me akadjy idjan imā idjāpēnh jarē. Ba kam me amā idjāpēnh ar iba. Mỳj idjāpēnh nā? Bir, ije me kunīmā prīne Metīndjwỳnh kabēn'ā idjujarēnh itēm nhyṃ me kunī kute marmā.

<sup>26</sup> Amrēbē ne me kunībē Kritu apdju ne. Nām me bakukāmāre amikam kra jadjwỳro tēm tāmtā: nhyṃ bipdjur rā'ā. Nhyṃ kam ajbir Metīndjwỳnh arỳm memā o amirīt, ta ō me mextire jamābit o amirīt ne. Kute amim me ja'ā karōkōt ne memābit o amirīt ne. <sup>27</sup> Amrēbē ne amim 'ā karō ne kam mebē udju: ne. Ne arỳm jakam memā o kato, ō me mextire jamābit ne o amirīt ne. Mỳj ne mekbē udju ne ajbir memā o amirīt ne? Bir, Kritu me bakadjwỳnhbē ýrja. Tām ne gu me ō mỳjja mex'ā amim kamnhīx ne. Kritu me bakadjwỳnhbē ýrkam ne myt kunīkōt mā me bamā mỳjja mex ngā ba me ikīnhkumrēx. Mā ne mỳjja mexja kute? Bir, mỳjja mex ja ne apēx prām kētkumrēx. Mỳjja mex ja ne mexo kute mỳjja kunī jakrenh, kute me kute ō nēkrēxo amimexja kunī jakrenh mex ne. Dja mā amirīt rā'ā ne. Djām me kwỳmā ne o amirīt ne? Kati, pyka kunīkōt ne ō me jamā o amirīt ne.

<sup>28</sup> Bir be, kam ne bar mā me kunīmā Kritu'ā ajarē. Ar ikrā mexkōt, ar ikabēn mexo ne bar me kunīmā tīn jangijn me kunīmā Metīndjwỳnh kabēn jarē. Ar ije Metīndjwỳnhmā meo imōr ne kum me ōrmā. Me kunī arỳm kute Kritu mar mex ne kute inomā mēnh, me tām ne bar ije Metīndjwỳnhmā meo imōr ne kum me ōrmā.

<sup>29</sup> Kadjy ne ba idjâpênhkam ityk djâ kêt ne. Djâm Kritu rerek got. Axwe tỳx ne ta tỳxo ijo tỳ:x ba kam me kadjy idjâpênh ra:x ne.

## 2

*Kritu ajbit rax nhyr me kute ja mar kadjy ne Paur djâpênh raxja.*

<sup>1</sup> Ê, ba ar amã arẽ, gar ama. Gora ar amã idjâpênh raxjakôt ima. Krĩraxbê Raodjikam ar jamẽ apỹnh krĩ rũnh djâri me jamẽ me aje te ipumũnh kêt ba akrãnã ar me akunĩmã idjâpênh ibaja pumũ.

<sup>2</sup> Mỳj kadjy ne idjâpênh raxja? Ije ar amã tỳx jangjênh gar ajte atỳxmã. Ne ajte ar amã aben jabên axikôt akabên ne ar abamã. Ga kam ar aje mrãmri Kritu markumrẽxmã, Metĩndjwỹnh kute prĩne mekbê o bipdjurja ar aje mar ne aje katât kôt mar ar o abamã. Mỳj ne mekbê o apdju? Kritu. Kritu mekbê bipdjur ne gar aje marmã. Me kute Kritu mar rax ne kute mrãmri me õ nêkrêx rũnh pyrâk. Dja gar ã Kritu mar rũho ane. Kadjy ne idjâpênh raxja.

<sup>3</sup> Nã, Kritu pydji ne kute amikadjy memã no mex jangjênh djwỹnh. Ajbit kute memã Bãmmẽ ar kukràdjào amirĩt, kukràdjâ bipdjurjao amirĩt nhyr kôt me arỳm õ mỳjja mex maro tẽ, õ mỳjja mex maro tẽn kam kôt no mex. Nhyr kam apỹnh me kute Metĩndjwỹnh nhõ mỳjja mar djâri mrãmri kute õ nêkrêx mextire ja pyrâk. Be, ga Kritu pydji kute amikadjy memã no mex jangjênh nhyr me no mex ne kute õ mỳjja marja pumũ. <sup>4</sup> Atemã 'õ kêt. Ta pydji ne kute Bãmo amirĩt. Ê, me'õ kute ar anoo biknor karõ ne ba ar amã katât 'ã ajarẽ. Me 'êx ne kute kabên punuo amikabên mex ne o kute ar anoo biknor karõ ne ba ar amã ane.

<sup>5</sup> Nãm te jãnh prãme ba amybỹmbit imã ar akĩnh ne ar amar rã'ã. Arỳm ne ba ar aman kam ikĩnhkumrẽx ne. Nã



gãm ar amim Kritu markumrêx ne 'ã angrà tỳx ne amã me uma kêt ne kanga kêtikumrêx ne 'ãno dja, ne akrànmã aben mẽ ar aba. Ba kuman kam ikĩnhkumrêx ne.

*Ar kute Kritubit mar kadjy.*

<sup>6</sup> Bir be, ar aje Kritu Jejuo anhõ Bẽnjadjwỳrkam ã kôt amijo abao ane, anhõ Bẽnjadjwỳr Jejukôt ã amijo abao ane. <sup>7</sup> Dja gar ã amũ Kritu maro abikamẽnho atêm kute mrãmri ne pĩ abatành kadjy kute pykamã arê ngjênh ne kute pyka 'amỳnh tỳxja pyræk. Dja gar ã amũ Kritu maro abikamẽnho atêmo ane, ne ã Kritu 'amỳnh tỳx ne 'ãno adjãmo ane. Ne amrêbê ar aje amim Kritu marja arek o tẽ. Me kute ar amã arênhkôt dja gar arek o anhỹro tẽ. Dja gar ã o anhỹro atêm rã'ãn pĩne mar tỳx ne. Ne kam Metĩndjwỳnhmã amikĩnh jarẽ, ne kum amikĩnh jarênh 'ãno dja.

<sup>8</sup> Dja gar aminêje me kabên punuwã pumũ. Dja me kabên punu 'êx ne amijo kabên mex ne mõn ar anoo akno. Djãm me kabên punuja kabên katàt got, kabên mex got? Kati, me kabên kajgo mexi. Me ta ne me ar abenmã 'êx ban amũ abenmã arênh mõi tãmtã nhym ĩ kamingrãny amũ abenmã arênh mõi. Djãm Metĩndjwỳnh kabênkôt ne wã? Kati, me ta kukràdjækôt ne me kabên kajgowã. Nhym bep atemã ne Kritu kabên katàtã. Mrãmri katàt arẽ.

<sup>9</sup> Kubê Metĩndjwỳnh djwỳnhkumrêx. Amijo kubêngòkren me bawỳr pykamã ruw. Kubêngòkrekam ne kubê Metĩndjwỳnhkumrêx. ãm Metĩndjwỳnh djwỳnhĩ. Ta ne kubê Kritu. <sup>10</sup> Ne ta gwaj bakadjwỳnhbê nhỳn gwaj bamã umar mexti:re jarẽ. Gwaj bamã umar mextire jarẽ gwaj kam bakĩnhkumrêx. Mã ne gwaj bakĩnh kute? Bir, mrãmri me kute õ nêkrêx rũ:nhkam kĩnhja pyræk. Dja gwaj Jejukam bakĩnho bamã nêkrêx kĩnhja jakrenh mex ne. Ë, mrãmri ne Kritu raxo kute me bẽnjadjwỳr rũnhmẽ

me bēnjadjwyr kry kute meo baja kunĩ jakrenh. Ta ne umar mexo ar gwaj bajo ban gwaj bajo kĩnho ba, gwaj bamã kĩnh jangjēho ba.

<sup>11</sup> Arým gwaj baje Krituo aminhõkam ne gwaj atemã bakukràdjà. Gwaj bakukràdjà tùm, gwaj bajaxweja ne gwaj arým tu wãnh kangan kum banhire. Ne kam gwaj bamex kute mrãmri ne mekbê idjaer kute me my nhinhu kà rēnh nhym me kam mex ne kĩnhja pyræk. Me bajtem kute Metĩndjwýnh nhõ me ja mar kadjy ne me me my nhinhu kà rê. Nãm me me my nhinhu kà rēn mùm kurēn kam kĩnh nhym Kritudjwý arým gwaj bamã gwaj bakukràdjà tùmja mùm ã rēnho ane gwaj kam ã badjwý ã bamexo ane nhym Metĩndjwýnh arým gwaj bakam kĩnh ne.

<sup>12</sup> Jeju akubyn tĩn ne me tyk krã kurũm kator'ã ne ngõnhmã gwaj bajangjēnhja amijakre. Ngõnhmã gwaj bajangjēnh ne kute Jeju tyk ne pykakam ir pyræk. Nãm me ã ngõnhmã gwaj bajangjēho ane. Ngõnhmã gwaj bakrã jangjēnh, gwaj kam akubyn bakrã apõx ne kute Jeju kēnkre kurũm akubyn tĩn ne kator pyræk. Metĩndjwýnh ta ne tỳxo akubyn Krituo tĩn, me tyk kurũm Krituo kato. Gwaj kam arým tu amim kamnhĩxkumrēx nhym kam ngõ kurũm me bakator kute gwaj badjwý akubyn batĩn pyræk, kute ta tỳxo Kritumẽ ro'ã gwaj bajo tĩn pyræk. Kam dja gwaj bakukràdjà nykõtbit amijo baba.

<sup>13</sup> Bir be, amrēbê ne gwaj baje batyk pyræk ne ar baba. Nã gwaj bajaxwekumrēx ne mùm amikukràdjà tùm rēnh kētkam kute me batyk pyræk. Nhym bep ajbir ne Metĩndjwýnh gwaj bajaxwe kunĩo biknorkumrēx. Nhym kam kute Kritumẽ ro'ã gwaj bajo tĩn pyræk.

<sup>14</sup> Arým ne Metĩndjwýnh Mõjdjê kukràdjào apêx. Mõjdjê kute memã “Kwãrĩk wãnh” anhỹr ne 'ã pi'õk no'õkja arým o apêx. Nã gwaj te kukràdjàkõt

amijo babamān ām mā bajamakkre kêt. Nhym kam Metīndjwỳnh òkre kadjwỳnhbê,

—Ikra tykkôt, mete pīte'ykam kum o i'êk nhym tykkôt dja me tu amim ikamnhīxkumrêx ba kam me'ā mex rê. Nām me te Mòjdjê kukràdjàkôt te o anen mar kêtumrêx ne, ane. Nām ā Metīndjwỳnh o anen ā Mòjdjê kukràdjào apêxo ane.

<sup>15</sup> Be, Kritu tykkôt ne Metīndjwỳnh me karō punu rūnhjadjwỳo ajkê, me karō punu nhō bēnjadjwỳrmê, me tām ne Metīndjwỳnh meo ajkê. Nām me amipardja'ā me pa 'amỳn kam meo kurwỳko ban meo bôx. Me ipôkri ne me meo kurwỳko ban meo bôx ne kam prīne mekbê àbêr djà kunīo apdjun kam memā me uma ngrành mex ne. Nhym me kunī kôt omũn arỳm kôt kuma. Nām ā Kritu tykkôt ā Metīndjwỳnh me karō punu rūnho bikēnho ane.

<sup>16</sup> Metīndjwỳnh kute me karō punu rūnho bikēnhkam kwārīk wānh ò kukràdjàja mar kêt. Nām me Mòjdjê kukràdjà kupa'ā mekbê mỳjja pyma ar o ba ne memā amijangri'ā apnê. Bir be, kukràdjà kakritja dja gar mar kêt. Metīndjwỳnh arỳm kute mỳjja tũmjao apêxkam dja gar mar kêt. Kwārīk wānh ga arīk ar adjàkur abakam gê me'ò adjàkur mỳr jabej ar amā kabēn 'ò jarēnh kêt, nār kon, mỳjjao akòm mỳr jabej gê me'ò ar amā kabēn 'ò jarēnh kêt. Nār kon, me rer mex 'òkam, mytyrwỳ 'òkam, akati 'òkam, me rer mexo mōrkam, mekôt ar aje amijo anhỳr kêtam, kwārīk wānh gê me kam ar amā kabēn 'ò jarēnh kêt. Kwārīk wānh mỳjja kukràdjà ja mỳr jabej gê me'ò ar amā àkrê kêt.

<sup>17</sup> Kritu bôx kêttri ne me kukràdjà ja arīk kam ar ba. Nām me Kritu kutêp ar kukràdjà jabito ba. Kajmā'ā ari o ba nhym kam bôx ne arỳm o ajngrà, kukràdjà tũmja tu mũm kumê.

<sup>18</sup> Kwārīk wānh me 'êx ne kute amijo pijàm ne arīk Metīndjwýnh kadjy mrānh djwýnhmā kabēnja wānh nō. Nām me kum mỳjja ja kīnh ne 'ā ar amā apnê, ar aje me kudjwamā. Nām we me,

—Dja gar me ikudjwa kadjy mrānh djwýnhmā amijarēn kum rax jarē nhym arým Metīndjwýnh kum ar akīnh. Dja ga ar o anhyr kêt nhym arým kum ar akīnh kêt. Djām abēnjadjwýr got ga tu Metīndjwýnhmā akabēn, ane. Kati, nām me 'êx. Kwārīk wānh wām nō gē me ja ar anoo biknor kêt.

Nām we me biptirkam mỳjja pytiro ikwān we ar amā kôt 'ā ujarēnh ba. Kati, nām me 'êx. Me ja ne me kajgo mex ne kam we ar amā mỳjja jarēnh ba we amijo àmra ba. Kati, nām arīk ar ta amijo 'êx ne amijaxwekôt animan kam we amijo àmra ba. Kati, nām me 'êx. <sup>19</sup> Ne arým Kritumā iren 'amýnh kêt.

Kritubê Metīndjwýnh djwýnhkumrêx. Ta ne wýnhī. Kute ta krā pyrāk. Me baje Kritu mar ne gu me baje ī pyrāk. Nhym bep Kritu ta ne kute krā pyrāk nhym me kum iren 'amýnh kêt. Nā gu me bakukràdjari ajkanhōk ne kam tu batypydji. Apýnh kêtê. Me bakukràdjāmē me bakudjêk kunīo aben pydjin me bakrāmā kumē.

Nām ā Kritu ta kubê krākam ta īo djuw mexo tē, me bajo djuw mexo tēmo ane. Kritu ne ta ō me jamā bēnjadjwýr ne kam amim meo atom ne meo djuw mex. Te apýnh me ba djari baba nhym tu amim me bajo atom, me bajo aben pydji gu me batypydjin aben mē ar baban kam kôt bamā aben jabēn kam baro'ā Kritu maro tē. Metīndjwýnh ne amim me bajā karō gu me kam kàjmā kôt ā maro batēmo ane.

<sup>20</sup> Arým ne gar Kritumē ro'ā ty nhym arým ar amā mỳjja kukràdjā kakritja mūm kumē. Kritu kute ar amā mỳjjao apêx gar kam mā ajte amā akukràdjā kakrit kīnh. Mýkam

ne gar akubyn mã amã pyka jakam me kukràdjà jabit kính ne kôt ar amijo aba? Nãm we me,

<sup>21</sup> —Kwãrìk wãnh byr kêt,

—Kwãrìk wãnh kakin kêt,

—Kwãrìk wãnh kupênh kêt, ã we anhÿr ar ba gar kôt amijo aba.

<sup>22</sup> Djãm Metĩndjwÿnh kukràdjà ne ja ne me we ar “Kwãrìk wãnh” ar o ban mekbê mÿjja puma ar o ba? Kati, me ne me ane. Kukràdjà tũm, kukràdjà kakritja arÿm kêt. Metĩndjwÿnh arÿm kukràdjà tũmjao apêx gu me arÿm kôt amijo baba kêt. Mrãmri kute me badjàkur djà pyræk. Tebê dja me batikkrekam apêx ne me banhĩ'ã apêx ne me bakràkà'ã mrã. Nãm ã kukràdjà kakrit, kukràdjà tũmja apêxo ane.

<sup>23</sup> Me kute mebê mÿjja pumaja ne me 'êx ne kabên mex ne. Bep kati, nãm me tu ar mÿjjamã amijarênh ba, mÿjjao Metĩndjwÿnh ne ar kum amijarênh ban 'ã memã apnê nhym me kudjwa. Nãm we me 'êx ne we ar amijo pijãmo ban ar ta aminhĩ djwÿnho bikênh ba. Me ta kute we amibê axwe rênhmã prĩne amijo bikênh ba. Metĩndjwÿnh kute memã ja jarênh kêt. Me ta ne me arìk ta kute amijaxwe bĩnmã apÿnh amijo ba djari amijo ba. Nãm me amititik ne kam amijo bikênh mexo ba. Kati, ãm kajgo mexi. Nãm me te aminhĩ djwÿnhja te o ane nhym ãm mã axwe. Djã nãm me amibê axwe kurê? Kati, nãm me te o anen mã axwe.

### 3

*Ar kute katàt amijo bamã arkum 'ã karõ.*

<sup>1</sup> Gora ar Kritumẽ ro'ã arÿm akubyn atĩnkam, ngô kurũm ar ajapôx kute akubyn atĩn pyræk, kam dja gar kàjkwakambit mÿjja jabej ajkam ama. Kam ne Kritu nhÿ, Metĩndjwÿnh djubôk'ãnh nhÿ. <sup>2</sup> Dja gar kàjkwakam

mỳjjakôtbit ajamak bën. Kwārīk wānh pykakam mỳjja mar kêt.

<sup>3</sup> Kute Kritumě ro'ã arỳm atyk pyrək. Djām me tykkam kute pyka jakam mỳjja mar got. Bir be, arỳm Kritumě ro'ã ar atyk ne ro'ã akubyn atīnkam, dja gar jakam, pyka jakam, Kritumě atypydjin ari ar aba. Nnym kam Kritu kadjwỳnhbê, Metīndjwỳnh ar ajo bipdjur mex ne, kute apytār mex kadjy. Kam dja gar kàjkwakam mỳjjabit ma. <sup>4</sup> Be, Kritumě ne gar atypydjin ar aban kam tu atīnkumrěx ne. Gêdja Kritu akubyn raxo amirīt ne kam abêngôkredjwỳ\* arỳm araxo amirīt.

<sup>5</sup> Bir be, kam dja gar arīk abawā tu krā'yrkumrěx gē on wānh nō. Kwārīk wānh gar krô'ã aprō kêt, nnym me nijadjwỳ krô'ã mjên kêt. Ar aprō prām, nnym me ni mjên prāmja kwārīk wānh nō. Gē me my prō prām ne kurě ar ba, nnym me ni ar mjên prām ne kurě ba kwārīk wānh nō. Me kum mỳjja punubit prāmja kwārīk wānh nō. Ne me kum nêkrěxbit prāmja kwārīk wānh nō. Nām me kum nêkrěxbit kīnh ne kam kôtbit amak bën ne kam kum Metīndjwỳnhja mar prām kêtikumrěx. Me kute mỳjjao Metīndjwỳnh karō nhipêx ne kute we kum ar amijarēho baja tām ne Metīndjwỳnh kum kīnh kêtikumrěx. Nnym me kum nêkrěxbit prāmjadjwỳ kum kīnh kêtikumrěx. Amě punu nnym kam kum kīnh kêtō aben pyrək ne. Kam ne ba ar amā,

—Tām gêdja on wānh nō, ane.

<sup>6</sup> Mỳjja ja kunīkôt ne Metīndjwỳnh mekam ngry:k ne. Godja me kute mỳjja jao ban kam kute Metīndjwỳnhkôt amijo ba kêtikumrěxja, me tām gêdja Metīndjwỳnh

---

\* <sup>3:4</sup> Apỳnh me ō pyka djari kunīkôt ne me kunī bêngôkre. Kuběkà jakamě me kakrātykmě me babêngôkremě ne me kunī: bêngôkre.

mekam ngryk ne ĩ memã o pãnh. <sup>7</sup> Nhyim bep amrêbê ne gar gadjwý ã amijo aba punuo anen ajbit ma.

<sup>8</sup> Bep jakam dja gar on mýjja ja kunĩ kanga. Kwãrik wãnh gar angryk kêt ne memã adjãkjêr kêt ne aje amipãnhmã mar kêt ne me kãmex jarênh kêt ne ajajk-wakam akabên punu 'õ jarênh kêt. Me my kute me nire kukràdjà'ã me aprýja dja kêt. Nhyim me niredjwý kute me my kukràdjà'ã me aprýjadjwý dja kêt-kumrêx.

<sup>9-10</sup> Kwãrik wãnh gar akukràdjà tũm jakôt abenmã ajêxnhĩ kêt. Arým ne gar akukràdjà tũmja mũm kunĩ mẽ. Ar aje akukràdjà tũmkôt aje abenmã ajêx aba ja ne gar arým nhĩ'ãm kunĩ mẽ. Pãnh ne gar akukràdjà nykôt mýjja mexbit ma. Metĩndjwýnh kute ar ajo ny nhipêx djwýnh ne ar ajo nyo tẽ, ar aje Metĩndjwýnh mex pyrãk kadjy ne ar ajo nyo tẽ, prĩne ar aje Metĩndjwýnh markumrêxmã ne ar ajo nyo tẽ.

<sup>11</sup> Metĩndjwýnh kute meo nykam ne me arým abenmã kre rax kêt ne tu arým abenã tỹm ne typydji. Arým Kritukôt me apỹnh ba djãri kute abeno kurê djwýnh kêtê ne kam arým tu abeno kamyn abeno õbikwa. Me bajtemmẽ mebê idjaermẽ, me tãm ne Metĩndjwýnh arým meo aben pydji. Ne ajte me my nhinhu kà rênhmẽ me mykà tãmẽ, me tãm ne Metĩndjwýnh ajte meo aben pydji. Me kute arým me krõrmẽ me krõr kêt apỹnh õ pykakam ba djãri bajamẽ, me tãm ne Metĩndjwýnh arým meo aben pydji. Me kute me pa 'amýnh nhyim me memã àpênh kajgo ar bajamẽ me kute memã o pãnh kadjy àpênhjamẽ, me tãm ne arým Metĩndjwýnh meo aben pydji. Nà, ne arým memã me kute abeno kurê djwýnhja arým o ajngrã. Kritukôt ne me aben pydji ne kam kute Kritubit mar, arým ajbit kute amikajmãtã mar. Djã nãm kum me'õ kĩnh kêt ne? Kati, nãm kum me kunĩ kĩnh ne me 'ãno dja. Nãm me 'ãno ãmo aben pyrãk ne.

<sup>12</sup> Ga Metĩndjwỳnh kute amijo ar apytàr ne arỳm kute amim ar ajo bikjêr ne kam kute ar ajo mex ne kum ar ajabêkumrêxja pumũ. Kam gêdja gar tu amim akukràdjà ny man kôt amijo aba. Gora ar amã me kaprĩ ne adjukaprĩ ne ar meo aba. Kwãrik wãnh ar ajõ apydji arax prãme ari aba kêt. Dja gar memã aprĩ mex ne ar meo aba. Tu akabôt katin akrànãmã ar meo aba. Be, mỳjja mex ja dja gar ã maro anen kam tu kôt amijo aba.

<sup>13</sup> Gêdja me'õ ari kute anoknoro ba jabej kwãrik wãnh ga kum adjàkrê kêt ne mã kum akabên mex jarê. Dja gar ã anen ar abeno aba. Dja gar abenkam amikrà rax jabej nàr kon amikrà ngri jabej tu o aknon abenkam angryk kêt. Gar Bẽnjadjwỳr djwỳnh arỳm ar aje kam amikràja tu o biknorkumrêx ne ar akam ngryk kêtja pumũ. Dja gar ã anen ar aje abenkam amikràja tu o abiknorkumrêx ne abenkam angryk kêt.

<sup>14</sup> Gora ar mỳjja ja kunĩkôt amijo aban kam ajte iby amã aben jabê. Gora ikabên ja ma. Ar amã aben jabên ar abeno aba. Ar atypydji djà ne ja. Ar amã aben jabên kam atypydjin kam amexkumrêx. <sup>15</sup> Djãm ar aje abeno ajtemmã ne Metĩndjwỳnh amiwỳr ar ajuw? Kati, gar atypydjin aben kam adjumar mex kadjy ne amiwỳr ar ajuw. Bir be, kam dja gar adjumar mexbit ma. Kritu ta umar mextire jao dja ar amã umar mextire jadjà ne o aben nêje me akukrà. Dja ta õ me umar mex djào prĩne ar ajaên kam o aben nêje ar ajakre. Ë, gora ar Metĩndjwỳnhmã amikĩnh jarê.

<sup>16</sup> Gora ar prĩne ajamakkrekam Kritu kabên kunĩ nhôn kôt ar amijo aba. Ne akabên mexo abenmã Metĩndjwỳnh kukràdjà jarên o abenmã tĩn jadjà. Ne Metĩndjwỳnh'ã angrer aba. Mebê idjaer nhõ me ngrer tũm jarên kam ajte Metĩndjwỳnh Karõ kute ar amã me ngrer ny jarênhjadjwỳ



jarẽ. Ne Metĩndjwỳnhmã ar amikĩnh jarẽ, angrerkõt kum akadjwỳnhbê akĩnh jarẽ.

<sup>17</sup> Dja gar Bẽnjadjwỳr Jejukõt amijo aban Jeju Bãmbê Metĩndjwỳnhmã amikĩnh jarẽ. Djãm ar akàtàm, djãm ar anhõ bẽnjadjwỳr kêt dja gar adjàpênh punun akabên punu? Kati, ar abê Bẽnjadjwỳr Jeju nhõ àpênhkam dja gar adjàpênh mexkumrêx ne akabên mex ne. Ar abê Bẽnjadjwỳr Jeju nhõ àpênhkam dja gar anhõ bẽnjadjwỳrkõt amiman kõt akabên mexkumrêx ne kõt adjàpênh mexkumrêx ne mỳjja kunikõt Jeju Bãmbê Metĩndjwỳnhmã amikĩnh jarẽ. Kritukõt kum amikĩnh jarẽ.

<sup>18</sup> Ë, ar apa, ar anire, arỳm ar amjênja dja gar amjên kabên man kõt amijo aba. Bẽnjadjwỳr djwỳnh kute ar amã ã anhỳrkam dja gar ã amjên kabên mar ne kõt amijo abao ane nhym kam mexkumrêx ne.

<sup>19</sup> Ë, ar apa, ar amy, ar amã aprõ jabên kum akabên djà jarênh kêt ne kum akabên mexbit jarẽ.

<sup>20</sup> Ar apa, ar aprĩre, gora ar ar anãmẽ ar abãm ar kabên man ar kabênkõt amijo aba. Ar kute ar amã kabên jarênhjakõt amijo aba ne o abiknor kêt. Nhym kam Bẽnjadjwỳr djwỳnh ar akam kĩnhkumrêx ne.

<sup>21</sup> Ë, ar apa, ar ajabatànhja, kwãrĩk wãnh gar akra arkum akabên kêt ne arkum ngryk jadjàr kêt. Arkum akabên mexbit jarẽ. Dja gar arkum adjàkrê nhym ar arỳm kaprĩ ne katàt mrãnhja kanga.

<sup>22</sup> Ë, ar apa, memã ar adjàpênh kajgo ar abawã, me kute ar ajo pãnh ne amim ar apa 'amỳnh gar memã adjàpênh kajgo ar abawã gora ar pyka jakam ar apa 'amỳnh djwỳnhja kabên ma. Kute mỳjja ar amã arênh kunikõt dja gar kabên man kõt amijo aba. Djãm me kute ar apumũnho ku'êkambit got gar memã adjàpênh mex ne, nhym we me ar akam kĩnhmã? Kati, me kàxãdjwỳ dja gar

tu adjàpênh katàt ne. Ar amã Běnjadjwỳr Jeju kĩnh ne amã umakam dja gar tu kum adjàpênh katàt ne.

<sup>23</sup> Gora tu ar adjàpênhkumrêx. Kwārĩk wānh gar adjàpênh punu kêt. Dja gar tu adjàpênh kunĩ amã kĩnh ne kupêho tẽ. Ne tu adjàpênh mexkumrêx ne katàt adjàpênh tẽ. Djām pykabê mebêngôkre 'ôbitmã ne gar apê? Kati, kàjkwa kam ar anhõ Běnjadjwỳrmã ne gar apê. Kam ne ba ar amã katàt ar adjàpênh'ã karõ, ar aje katàt adjàpênhwão atēmã ne ba ar amã adjàpênh'ã karõ.

<sup>24</sup> Gora ar ama. Běnjadjwỳr djwỳnh ta dja ar amã o pānh. Kute õ me jamã mỳjja mextire djirja dja ar amã kungã gar amim aby. Bir be, Běnjadjwỳr Kritumã ar adjàpênhja man kam kôt kute ar apa 'amỳnh djwỳnhmã adjàpênh ar aba.

<sup>25</sup> Bep apỳnh me axwe djari gêdja Metĩndjwỳnh memã axwe pānh jarêho tẽ. Amrêbê tĩnri axweri gêdja Metĩndjwỳnh kôt kum o pānh ne, tĩnri axwekam dja memã o pānh aben pyrək ne. Djã nām we,

—Ije bep tāmja ne ôbikwa krãptĩ ne kam běnjadjwỳr rax. Kwārĩk wānh kum pānh jarênh kêt. Ba 'uwtĩjamã pānh jarê, anhỳr got? Kati, nām tu memã pānh jarêho aben pyrək ne. Ne me axwekam katàt memã o pānh.

## 4

*Me* běnjadjwỳr kute õ àpêho ba katàtmã.

<sup>1</sup> Ě, ar apa, ar aje meo pānh ne amim me pa 'amỳnh nhym me ar amã àpênh kajgo ar bawã, ar amã ne ba ikaběn. Gora ar anhõ àpênhmã akaběn mex jarên meo aba katàt. Ě, ar gadjwỳ ne gar kàjkwakam anhõ Běnjadjwỳr. Gora ar ama. Tām ne ja.

<sup>2</sup> Ě, ar apa, gora ar akupānhtã Metĩndjwỳnhmã akaběn 'ãno dja. Gora ar Metĩndjwỳnhmã amijarênhkam amã adjukanga kêt ne aje kum amijarênh ar o abakôt aje

mỳjja'ã 'wỳrja tãm dja gar kam ama. Ne kum ar akabēnkôt kum amikĩnhdjwỳ jarēnh 'ãno dja.

<sup>3</sup> Kum ar akabēnkôt ar badjwỳ kum ar ijo a'wỳ gē Metĩndjwỳnh mỳjja kute ar ibē àptàrjao ajngrà bar tu memã Metĩndjwỳnh kabēn jarē, memã Kritu jarē. Nãm mekbê apdju bar kam ije memã o amirĩtmã. Kam ne ba mekbê ijê djàkam idjãmja. Nã bãm ije memã Kritu jarēho itēm katikôt nhym me mekbê ijê djàkam imē. <sup>4</sup> Bir be, kam gēdja gar kum ijo a'wỳ, ije memã arēnh ne ije katàt memã o amirĩtmã. Ije Jeju mekbê bipdjurja memã arēnh ne ije memã mã o amirĩt nhym me kute katàt marmã. Nà, kadjy ne Metĩndjwỳnh amim idja, ije prĩne memã o amirĩtmã. Tãm ne ja.

<sup>5</sup> Be, me kàtàm kadjy, me kute Jeju mar kětja, kadjy dja gar akrànmã amijo aba mextire ne memã akabēn mexbit jarē. Gēdja aje Jeju'ã adjujarēnh djà awỳr bõx ga kam mekmã Jeju jarē.

<sup>6</sup> Gora akrànmã memã adjujarēnh akrĩ gē me ar amã,  
—E kum goja ajte adjujarēnh nhỹ. Ga nã gãm akabēn mar prãmre, ane. Gēdja me kute mỳjja 'õ mar prãm jabej akukij ga kam memã katàt 'ã adjujarēnh nhỹ. Be, tãm ne ja.

*Apỳnh òbikwamã kute kabēn janor.*

<sup>7</sup> Ota me bakamy Xikiku dja ar amã prĩne ijarē. Gwaj bamã Xikiku jabèkumrēx tãm dja ar amã ijarē. Nà, nãm ikôt àpēnh mexkumrēx ne àpēnh kanga kêtikumrēx. Bēnjadjwỳr nhõ àpēnhkumrēx ne ja. Nãm ar ikôt kum àpēnh ar ba. Ta dja prĩne ar amã ijarē. <sup>8</sup> Kadjy dja ba ar awỳr ano, kute ar amã ar ijarēnh gar aje ar imar nhym kute ar amã kĩnh jadjàr gar ajte atỳx ne akĩnhmã. Kadjy dja ba ar awỳr ano. <sup>9</sup> Gwaj bakamy Ônemudjwỳ dja ba ano, wãm ar ro'ã ar ano. Gwaj bamã Ônemu jabèkumrēx, tãm

dja ba ano. Nām amim Kritu markumrēx ne kanga kêt. Ar ajō 'ō. Be, ar ta dja ar ar amã jakam mỳjja kunī jarē.

<sup>10</sup> Gwaj bakamy Arxakumē ar iro'ã mekbê ijê djakam dja. Ne ar ajo aman wām ar amã amijarē. Nhym Makudjwỳ kubê Banabe tàm djwỳja adjwỳnhdjwỳ ar ajo aman wām ar amã amijarē. Ē, arỳm ne ba ar amã 'ã karō. Dja ar awỳr tēn bōx gar amiwỳr o wadjàn kum akabēn mex jarē. <sup>11</sup> Jejuw, mete kum Juxu jarēnhja adjwỳnhdjwỳ ar ajo aman wām ar amã amijarē. Be, Arxakumē Makumē Jejuw ar ajbit ne Ar kubê idjaer ne kute amim Jeju mar ne ar ikôt àpēnh ar ba. Ar kute mekmã Jeju jarēnh nhym me kute amikajmātã Jeju mar nhym Metĩndjwỳnh kute ar meo bamã ne ar ikôt àpēnh ba. Nām ar ikôt àpēnh mexkumrēxo ikĩnh ne.

<sup>12</sup> Epapraj, ar ajō 'ō ne kubê Kritu Jeju nhō àpēnh ne ar ajo aman wām ar amã amijarē. Nām Metĩndjwỳnhmã ar ajo à'wỳr 'ãno dja. Tyk djà kêt ne ar ajo à'wỳro ban kum,

—Ga dja ga aro tỳx gē ar ajã ngrà tỳx ne akanga kêt ne amar mex nhinomã kurē. Ga dja ga arkum 'ã karō gē ar kôt mrã, aje amim ar'ã karōkôt mrã. Nām ã kum ar ajo à'wỳro ane. <sup>13</sup> Be, ba ne ba inoo Epapraj pumũn kôt ar amã 'ã pi'òk no'òk ne. Mrãmri ne ar ajã àpnhĩx ne. Krĩraxbê Raodjikam ar jamē krĩraxbê Ijeporikam ar jamē me akunĩ'ã ne àpnhĩx ne. Ba ne ba arỳm omũn ar amã 'ã pi'òk no'òk ne.

<sup>14</sup> Rukabê me kane djwỳnh gwaj bamã kĩnhkumrēxjamē Temanhmē ar ar ajo aman wām ar amã amijarē.

<sup>15</sup> Nã bãm Raodjikam gwaj baje abeno bakamyo ama ne. Gora arkum ijarē. Nĩpa nhũrkwākam ar kute Jejukôt aben pydjiwãmē Nĩpa bēngòkremē ne ba o ama ne. Ar wãmãdjwỳ ijarē.

<sup>16</sup> Ē, ije ar amã pi'òk no'òk nhōrwã gar omũ:n omũnh pan kam amũ krĩraxbê Raodjikam ar kute Jejukôt aben

pydjiwãmã angã gê kam ar amipãnh ar amã wã ngã. Dja ba ije wãm ar amã pi'òk no'òk nhõrwã gar ga wã pumũn amũ ar wãmã angã gê Raodjikam ar wã amrẽ amipãnh ar amã wã ngã. Gar aprakamã omũ.

<sup>17</sup> Ë, Akipumã kum,

—Gora Běnjadjwyr kute amã adjàpênh jarěnhja on o tẽn inomã amě, ane.

<sup>18</sup> Ba ibê Paur ne ba wãm ar amã ikaběn ne. Nym bep ngrire ja ne ba ba inhikrao ipêx ne. Nã bãm ar ajo aman kam wãm ar amã amijarě. Gora mekbê ijê djàkam idjãmja man o abiknor kêt. Gê Metĩndjwỳnh ukapríkôt ar ajo djuw mex. Tãm ne ja.

Metĩndjwỳnh Kute Memã Kabẽ Ny Jarẽnh  
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

